

中華民國二十五年十二月

陝縣志

歐陽玠署



中國方志叢書·華北地方·第一二四號

據民國歐陽珍修韓嘉會等纂影印
民國二十五年鉛印本

河 南 省

陝

縣

志

(一)

成文出版社印行

陝縣志

序

余少治兵家言尤喜考求地理之學所謂辨區域徵因革知要害察風土匪獨研鑽郡縣之志書而舟車所至亦必覽其城郭關津與夫山川險要默識一攻守之境於胸中抑豈性近使然歟曾不自意也在昔從軍入秦道經陝州南面乾山北臨大河東有穀陵之險西有函谷之固秦晉七十年之戰爭於是乎著頗嘆晉之所以西向制秦而扼其咽喉者亦憑恃先有此天險耳其後治軍山西每過茅津輒低回留連於砥柱濤聲硤石鳥道猶然不勝其思古之情蓋驗諸曩時芴然依違乎紙上者益覺親切而有味焉近者十年兼綜省政稽事考俗鑒往知來更有資乎賅洽精確之方志故於網羅放失及時纂輯之舉尤惓惓視爲要途綏遠初未有志附屬晉志之中創修之而未逮晉志之續修嘗躬與發其凡矣而冀豫二志且幸得觀其厥成此差可慰情者也夫甄綜排比省志粗具崖略而已求其淹貫精詳尤在各縣之志亦體例然也是以纂修省志必徵集郡縣之志而纂修一統志必徵集省郡縣志蓋其爲書展轉因襲加以剪削而後成試一按其蒐討點竄之迹不難得其根抵矣是故各縣之能及時修其志書固爲余中心所期望者也陝縣志之

待修已歷四十餘年矣運會推移變更較前代爲鉅其證今訂古有待夫商榷權度者亦衆盛矣乃能於十一月中重修歲事得不謂之勇猛精進乎哉余雖未獲見其原稿而讀其凡例固已刪汰舊文別增新事是能隨時代爲進化者實已有愜於余懷至其紀事核實纂言會精大抵可揣而知也嘗謂方志一書吾國信爲特出舉凡體國經野正名辨物考俗施治彰淑懲慝莫不燦然具陳其於國計民生政治教化人心風俗繼往開來所關者至大而敘述山川城郭關津要害險阻形勝供兵家之考鏡者不過其一端也憶先太僕序萬歷會稽志有曰一國者一邑之積也知所以治一邑則知所以治一國矣又曰志者政之紀也教之軌也審於斯二者則於治幾矣陝縣在清代爲直隸州轄有三縣今制爲縣由十一區行政督察專員領之都昌歐陽君蒞事三載人和政通百廢俱舉所屬六縣承流宣化類能有所振作亦可謂知所以治一邑而治一區矣今於親民察吏之餘獨具遠識瞭然於政紀教軌之所在而於所領之縣首開館修其志書且熱忱毅力早日報成一湊往時綿亘歲月坐糜膏火之弊於以見其監修之名非徒擁也書將付梓乞序於余余嘉其有合於先太僕之言略述治兵從政之有資乎方志者如此庶幾其他各縣尊重斯事繼陝縣之後而有所興起云中華民國廿有五年十月十日紹興商震序

陝縣志

序

縣志所以備國史取材周官外史氏掌四方之志孔子作春秋觀于百國寶書由來綦重矣故法貴謹嚴詞尙雅馴柳子曰參之太史以著其潔章氏曰志者志也其事其文之外蓋有義焉近世作者衆矣率多簡陋相沿難垂典則而繁猥龐雜或不能無譏焉則不諳史法之故也往者余主河南省政檢閱通志則猶清乾隆時書也而各縣百餘年來文獻之徵亦缺焉未備于是籌設通志館于開封復依部頒章則訂定各縣修志概要通飭遵行蓋所以繼述前修昭示來茲也今歲丙子陝縣志成專員歐陽君珍請余爲之序考陝縣舊爲周召分治之所據關河之肘腋扼秦豫之襟要崤函之固號爲天險所謂秦得百二者也春秋晉敗秦師與漢唐以來攻守戰伐之跡往往在焉大抵由秦隴以出關東與自中原以進三秦皆以崤函爲咽喉之地先至者勝後至者敗不能易也故歷代皆擇博大通方威信幹濟之才以鎮撫其地若唐之李泌崔鄴宋之寇準范祖禹其尤著者也陝舊爲州靈寶閼鄉盧氏之縣屬焉民國肇建始改爲縣斯志改縣後創作也余未覽其全書未知其於古之史法何如然觀其志例大體依修志概要歐陽專員通瞻明達治理吾

知其亦必能斟酌今古柳子所謂參之太史章氏所謂文外之義者將于是乎在後之來者不必旁詢博訪一展卷舉凡政教風俗農田水利設施之宜因革法戒之要莫不條分理晰其爲利豈淺尠哉余嘗巡視至縣覽其山川形勢之勝三門疏鑿之跡慨然想夫古今治亂之機與化俗宜民之道時進長而切究之今者輪軌橫度災患頻仍峭函之險要盡失民生之凋殘殊甚撫斯土者將如何生息教訓振興民氣繕完守備整頓國防以爲國家屏藩之寄乎周召之治遠矣而唐宋以來如李崔寇范之休烈咸具于篇蓋班班也是又余之所厚望也已中華民國二十五年十月吉安劉峙序

陝縣志

序

昔夏禹鑄九鼎誌各州之方物周禮夏官有職方氏實爲後世郡邑志乘之濫觴其所以正疆域明山川識古今之盛衰觀人文之隆替以爲興革損益之措施而備國史之取材誠一方之文獻纂關重要者也宋儒朱攷亭每到官必以修志爲先蓋彰往勵來正人心以正風俗攷古鑑今俾取法改善有所張本豈特發揚盛事而已哉陝爲召南舊治宏農古郡化行俗美人文蔚興而邑之有志則始于明季廢清之代數經修輯順治十五年州守吳世英從郡志內薈萃成編略而不詳乾隆十二年州牧龔崧林編纂直隸州志轄縣統載堪爲鉅製光緒十六年知州趙希曾重加修纂南海黃璟踵成其事又增續志十卷自此而後垂四十年未再編修其間經政體之改革學校之設立與夫鐵軌之西駛兵戎之頻興差徭之繁重民生之艱困變遷多端在在胥有記載之必要以爲施政者正本清源因地制宜興利除弊之資其修志之急而且要非同以前之墨守成規無大更張可比矧值此國難嚴重時期啟迪民智訓練團結以捍禦外侮增加生產復興農村以充實國力張四維以培養道德勵節約以敦厚風俗尤非著爲箴規行之永久俾潛移默化一道

同風不爲功且陝既由州而縣其修志之體例又當別論較之以前繁而且難更無待言喻余于癸酉秋奉命兼攝縣篆下車後詢民生之疾苦見地方之凋弊時值災荒之餘悉呈紊亂之象披閱舊日之志乘訪覽召伯之遺蹟今非昔比良用黯然于是先軍事以奠安社會繼建設以充裕民生謀文化之丕振風俗之改良卽以興學勸教端正士習爲先務而後從事于編纂縣志先是地方已有縣志館之設多年編修因人材與經費種種關係未克蒞事余以軍務旁午之際地方無力籌款暫令停擱越兩稔乙亥秋復召集地方人士籌募款項重新設立縣志局委用張以謙麻安邦兩君主理局事聘請韓合卿王夢魚兩先生爲總副編輯分委各組主任及各區採訪着手纂修依照省通志館頒發志目草案新開體例語不泥舊事惟求實余復詳加審核正其疵謬凡十有一月而脫稿用付梓以公諸世於以覽古今之治亂得失風俗之醇厚澆漓表彰先賢以勵來者而爲興利除弊之資端本清源之施後之蒞斯土者振興而化導之庶幾召南遺風猶有再見是不能不厚望也已中華民國二十五年八月都昌歐陽珍識

陝縣志

序

陝縣故宏農郡魏太和間始置州元明隸河南府清雍正初始升爲直隸州轄靈閣盧三縣而陝之有志明以前無可考清順治十五年知州吳世英創修州志乾隆十二年知州龔崧林纂修直隸州志所轄三縣附焉同治間州牧周仁壽曾增輯之僅本軍興以後採訪忠義節烈諸士女爲一編光緒十六年州牧趙希曾纂修未及成而以憂去官繼任孔廣聰重加採輯成書十有五卷垂成又受代去繼任南海黃璟實踵成之黃牧又修續志十卷迄今四十餘年未再纂修民國二十四年夏紫亭歐陽專員蒞任兩載詰奸除暴地方敕平復盡力於建設事業修建城南門外澗河橋梁人咸稱便當此承平無事之秋公遂倡議重新纂修縣志首由地方士紳組織縣志籌備委員會向各區及商會募捐洋壹萬元經三月之籌劃編輯及採訪人員均聘委齊全遂於斯年八月一日專員蒞任二週紀念且澗河橋落成典禮之正式成立縣志局開始採訪着手編纂安邦學識謏陋謬承歐公知遇之隆地方人士推戴之意忝膺局事惴惴有所不安顧開辦伊始一面由採訪員分途調查一面由各編輯着手整理其時總編輯韓君合卿兼任省國學專修館教授

未克返局由副總編輯王夢魚偕主任郭雲樵辛君實負責編纂按照省通志館頒佈各縣志目草案斟酌損益另開體例整理舊志加以增刪依類列入越六月而韓總編輯實行任事共同工作凡十有一月而脫稿都爲二十六卷分爲二十二門用付剞劂以公諸世自維愚拙督理無方無以奏事半功倍之效幸荷歐公指示之勤與夫編輯諸君高明之助未至折足覆餗得免愆尤是所堪以告慰者也書既成遂叙修志之巔末弁其端他若藻飾矜麗之辭以炫於人非惟不能爲且亦不敢爲也民國二十五年七月麻安邦序於陝西縣志局

陝縣志

序

陝志自清光緒庚寅纂脩後迄今四十餘年其間政體改革甲子以還兵戎頻興地方多事災祲荐臻餓莩載道種種慘狀不有記載將湮沒無傳且舊志散佚每搜求一閱而亦不可得則疆界不分山川不明良吏之政績無考賢人之軼事失傳所以考古鏡今彰往勵來又將何以取資矧志爲一方之文獻其宜起而脩輯之凡屬地方人士均已早具同心矣惟是年來多故舉辦不易專員歐陽公於癸酉秋蒞任首先勘定積年不可遏之禍亂數月之間地方敕平民斯安居繼則大事建設百廢俱舉利爲之興弊爲之除人民知有禮義之教士子得聞絃歌之聲安輯之餘卽倡議纂脩縣志當由全縣各區及商會籌募款洋萬元於乙亥八月設局編脩以謙學識之無才同伏獵謬承歐陽公委畀兼理局事中心惴惴頗不自安辭不獲命勉作馮婦幸荷歐陽公之指導及諸編纂之力助得以伴食中書坐觀厥成以向同地方人士屬望之意而今如願以償其爲幸也多矣安敢居毫末之勞乎丙子七月藁既脫抱呈歐陽公審正越三月始付印遂以成書乃贅詞以弁其端用誌始末民國丙子十二月張以謙識



陝縣志

序

陝志自清光緒十八年趙黃兩志修成後迄今四十餘年其間經政體之改革時勢之變遷人事之演進電光石火轉眼皆爲陳迹不有記載何以垂後而鏡遠乙亥夏紫亭歐陽專員蒞任兩載既以軍事而安靖地方復以政治而化育黎庶百廢俱興絃歌遍誦始倡議纂修縣志委豐以編輯重任辭不獲命勉學製錦時閭邑韓君合卿斲輪老手任總編輯之責幸有所倚適留汴未返不得不轉喜爲憂盲人瞎馬縱深淵之不臨何正路之由得爰商承麻慰若張益齋兩局長計劃進行並偕邑名士郭雲樵辛君實着手纂編整理舊志割剔三屬加以增刪參考廿四史以記載大事以補充人物採取山海經水經注以明山川之位置與古蹟之真實金石必經揚拓藝文必有著述至普通之碑碣短篇之詩文則分列於詩徵文徵之內人物列女生前不載蓋棺而後論定選舉科目斷自中等以上學校畢業其他民財建教實業交通本諸省通志館頒佈各縣志目草案分門羅列苟有可書不辭繁碎越六閱月而韓君返總理其成計成書二十六卷別爲八冊凡十有一月而歲事歐公復命豐詳加釐訂補闕拾遺多所更正抱呈審定用付棗梨以行諸世自

維才短襪線用乏鉛刀謬承付託之重夙夜惕勵惟恐隕越幸荷歐公勤加指示局中同人共加研討因人成事何敢掩過以自炫乎第以時間未久詢訪難周滄海或竟遺珠掛一容許漏萬後之君子增益而修明之是所厚望也夫

民國二十五年暑月陝縣教育局長王樂豐序

陝縣志

叙

莊周曰飾小說以干縣令餘杭章炳麟以爲史之所記大者爲春秋細者爲小說管子曰春秋者所以記成敗也行者道民之利害也以其掌之行人故謂之行漢書藝文志所載周考周紀周說諸書皆輜軒之使采之郡國閭里而記之而青史子五十七篇本古史官記事書以其事叢瑣非王朝之要故劉班箸錄不與國語同隸于春秋而列于小說家隋書經籍志小說家敍錄稱周官誦訓掌道方志以詔觀事道方慝以詔辟忌以知地俗職方氏掌道四方之政事與其上下之志誦四方之傳道而觀衣物唐書藝文志張華博物志十卷高彥休闕史盧子逸史各三卷宋史藝文志蒲仁裕蜀廣政雜記十五卷司馬光遊山行記十二卷虞荔古今鼎錄一卷蘇轍龍川志六卷李冰治水記一卷皆紀山川物產政俗金石之書而悉錄在小說家綜斯以觀知蒙叟所謂小說蓋行人職方之所掌此卽後世方志之類明其不同于春秋非傳會傳奇之小說也蓋殷周之際衆建諸侯以世其地王朝設史官以記成敗諸侯亦莫不有史官以記偏國行事故墨子得見百國春秋自秦漢而降變封建爲郡縣郡縣之有志猶侯國之有史其來尙矣而專載一類者有南

方草木南州異物志以辨物產洛陽伽藍荆楚歲時記以道風俗陳留耆舊汝南先賢傳以紀人物元和郡縣元豐九域志以考地理合之以爲方志此不得以春秋國語比輓世休寧戴震論修志詳于地理沿革而不重文獻會稽章學誠非之以爲不解史法學誠作志書輒上擬遷固章炳麟非之以爲不知類然自學誠而方志之體始尊蓋學誠邃于史學生無纂史之機乃藉手方志以發揮其史才要之縣邑志乘固不能上比春秋然爲國史之要刪故爲方志者以明于史例爲貴陝縣地介穀函管轂秦豫北枕大河南障幹山宏農古郡山川之形勢如故甘棠舊治風俗之醇樸猶昔蓋中州名邦誠有足以記載者而舊日志書諸多散佚據朱士嘉方志綜錄所載凡五書皆清時纂修明以前無傳焉而陝縣現存者僅龔趙二志及黃璟續志間尙殘闕不完趙黃書成于光緒十八年去今數十年地方屢經劇烈之事變迄闕焉不載苟卿曰文久而滅節奏久而絕故五帝之外無傳人非無賢人也久故也五帝之中無傳政非無善政也久故也况一方文獻易于湮沒久闕無紀將有失徵之歎民國十七年余長縣教育局時曾擬續輯以困于資不果行越七年歐陽紫亭縣長蒞陝之二年令行禁止庶政咸舉卽商之地方耆艾籌資開館從事于此余以寡昧被任編纂幸同館有閬鄉韓君合卿邑人王君夢魚辛君君實張君益齋